

سري جدا

۱

سري جدا
شعر
محمد مصري
الطبعة الأولى



دار الحلم للنشر والتوزيع
٤ شارع الأشراف - من شارع مؤسسة الزكاة - المرج - القاهرة
موبايل : ٠١١٤١٨٢٤٥٦٢
dar_el7elm@hotmail.com
المدير العام : د. إسلام فتحى

تصميم الغلاف : محمد عبد السلام
إخراج داخلي : الحلم للدعاية والإعلان

رقم الإيداع: ٢٠١٦/٢٢٤٨
رقم التقييم الدولي : 978-977-798-039-5

إن دار الحلم للنشر والتوزيع، غير مسؤولة عن آراء المؤلف وأفكاره، وتعبّر
الآراء الواردة في هذا الكتاب عن آراء المؤلف، ولا تعبّر بالضرورة عن آراء
الدار .

محمد مصري

سري جدا



oboeikan.com

مقدمة

السر الى بيعيش وبيموت جواك ما بين الوجد الحقيقي
والضحكة المزيفة ما بين شكلك في الشارع قصاد الناس وما بين
شكلك وانت في اوضتك المقفولة كل دي أسرار ساعات كتير
عشان مش بنعرف نبوح بيها لحد بتندفن في وحده وخوف
وبنفضل ندارى في الاسرار دي لحد ما بنموت بيها

سري جدا عبارة عن أنت وأنا وكل شخص في هذا الكون
هتلاقي أسرارك المدفونة في الديوان ساعات كتير هتحس أن
الكلام بيعبر عنك وهو فعلا مكتوب عشانك أنت
حاولت إني أكتب كل حاجه بشوفها في وشوش الناس من أسرار
وخوف وضحكة مزيفة وفرحة بس فرحة بجد هتلاقي كل
حاجه فيك مكتوبة على هيئة حروف

oboiikan.com

إهداء

أمي / ست البنات يعني ست مش بألف راجل لا دي ممليون راجل يعني
الام اللي اتحملت كل حاجه عشان تشوف
ولادها احسن الناس يعني جنة ربنا على الارض

أبويا / اللي اسمه مش جنب اسمي في البطاقة لان الاب مش اللي بيخلف
لا الاب هو اللي بيربى الاب اللي بيبقي ضهرك وسندك في الحياة ورغم اننا
ساعات كتير تفكيرنا بيبقى عكس بعض لكن انا بحبك جدا

اخويا / يعني أبويا التاني اللي بيشيل على طول همي واجدع راجل في
الدنيا بحالها

oboiikan.com

ممنوع الفرح للأيتام

ممنوع الفرح للأيتام ..
وان كنت بتدخل علشان بس تنام ..
النوم صعب جدا ...
على حد موجوع م الأيام ..
اليتم مش انك ..
تفقد امك .. ولا حتى ابوك ..
اليتم ف انك تفقد روحك ...
من خلق سابوك ..
ممنوع الفرح للأيتام ...
وانك تضحك علشان بس متبكيش ..
وانك تسكت علشان بس تعيش ..
وانك برغم انفاسك بتموت ...
وبرغم القوة اللي ف شكلك ..
انت عباره عن بسكوت ..
مممكن ف ثواني تكون مكسور ..
بتحب الناس ..
وتحب تعيش بس مستور ..
لكن انت يتيم ..
ف بتبقى على دموعك دايمًا مجبور ..
ممنوع الفرح للأيتام ..
واليتم مش انك ..
تفقد امك .. ولا حتى ابوك ..

اليتم فـ انك تفقد روحك ..
من خلق سابوك ..
انا واحد من مليون ..
بيحب الضلمه عشان يبكي ..
ويحب الليل جدا جدا ..
وبرغم الي فيه دايمًا ..
بيحب يسمع للغير ..
ولا مرة حتى فكر يشكي ..
ممنوع الفرحة للأيتام ..
اليتم انك تبقى فاقد ..
ريحة الدنيا والطعم ..
وانك تبقى عايش بلا اهداف ..
اليتم انك فـ وسط اهلك ..
من جواك برضو تخاف ..

عندي رغبة شديدة جدا

عندي رغبة شديدة جدا ..
فاني ابكي من غير سبب ..
قلبي خاف لما شاف ...
القدر اللي انكتب ...
واللي انكتب صعب اعيشه بس مرة ..
بس انا جربت اعيشه الف مرة ..
حد خايف لما يخرج م الحياة ...
ما يلاقيش اسمه في الجنة بره ..
ف يفضل واقف مكانه ..
قصاد نفس الشريط ...
مجرد انسان ندمان ...
ف صورة شيطان عبيط ..
ويحاول انه يرجع ...
لكن خلاص مفيش رجوع ...
من حفرة الذنب الغويط ..
عندي رغبة شديدة جدا ...
فاني اطير من غير جناح ...
قلب الأرض كله اسود ...
مفهوش لأي انسان براح ..
ولما طفل يكون بيضحك ...
وضحكته تكون بانشكاح ...
نحسده ع الضحكة لأن ...

روحنا بتنزف من كتر الجراح ...
نفسى افهم هو ليه ياترى ...
الحب دايمًا الحقيقي ...
ف كوني هذا مش مباح ...
عندي رغبة شديدة جدا ...
اني اهزم بس خوفاي ...
واني لما الاقي حبي ...
ف مرة هيموت عشان ظروفى ...
اقتل الطرف اللي يمكن ...
يبقى ابعد من مد شوفاي ...
بس مكسرش قلب حد ...
كل ذنبه انه حب بجد ...
يا وجع قلبي وكسوفاي ...
عندي رغبة شديدة جدا ...
اني اكون انسان لمرة ...
واني اضحك مش بزيف ...
البياض بيكون لـ بره ...
والي جوه ساعات كتير ...
بيكون اسود مش نضيف ..

ارزقنى يارب راحه البال

(١)

اكفيني شر الحب ...
لما يكون فيه طرف مقطوع ...
واهديني لاجل ما اكون ...
بعيد عن اي شيء ممنوع ...
واحضني كل صلاة ...
بخشية قرآنك المسموع ...
وفرحني لما اعيش ...
دايما ضعيف بدموع ...

(٢)

سهران عشان محتاج لحد ...
وفضلت سهران لكن مفيش ...
ملعون الوحدة لما تكون ...
بتموتك وفيك بتعيش ...

(٣)

مشكلتك يا صديقي انك ...
على طول لبلاد الغرب مسافر ...
وانا اللي على حلمي دايما ...

بجري وبحاول وبعاقر ...
انا عارف اني مش هوصل ...
لكن برضو بجري عشان ...
ربك قال اسعى يا انسان ...
واديني بقول لك يا صديقي ...
انا كنت محتاجك جنبي ...
ارجع و بلاش اي فلوس ...
دي فلوس الكون عادي تغور ...
بس احنا نرجع زي زمان ...
من غير قلبنا المكسور ...

(٤)

ميت ببسلم ع العايشين ...
عايشين نفسها لو بس تموت ...
معقولة انا نفسي حياتي تفوت ...
واكون مدفون ف تراب الأرض؟!
وان كنت بجد صحيح زعلان ...
ما تقوم لو بس تصلي الفرض ...
ربك يبشيل كل الأحزان ...
من اول يوم إلى يوم العرض ...
انا كنت ضعيف وبكون كداب ...
وفتحت ليا يارب ابواب و ابواب ...
لكن انا كنت همشي شمال ...
ارجوك لو بس قبل ما اموت ...

غير لي حالي من حال إلى حال ...
وارزقني يارب راحه البال ...
وارزقني يارب راحه البال ...

oboiikan.com

الروح لا تزال في جسدي

فاكره يوم لما سابك ..
ليه بكيتي بصوت عالي ...
ليه كلامك كان بنبرة مهزوزه ..
هو حَبُّ حُبِّ ..
كان بالنسبة ليه تسالي ..
الشريعة لا تحتم ..
كسر القلوب ...
كسر قلب البنت ذنب ..
من كبائر الذنوب ...
جاب عروسة وقال كلام ..
بس ليه .. ؟
يوم ما قال سلام ..
هو كان ف شعوره عادي ..
وهي يومها لما جت تنام ..
نزلت الأوجاع كوشي من السما ...
نزلت الدموع تمطر ..
ع السرير ..
قلب كان نفسه يلاقي ..
قلب يبحب بضمير ..
يا سيادة القاضي ده متهم بالأدلة ..
الحكاية فيها ضعف ..
اثباتات هجيب كتير ..

شات ورسايل ف فون ..
كلمة انتي لبستي ايه ..
كلمة انتي كالتى ايه ..
كل دي دوافع اهتمام ..
لما بتكون مش حقيقة ..
بيعاقب عليها القانون ..
ف لايد ولازم ياريس ...
بعد تقديم الاثباتات ..
يتحكم ع الجاني بأنه ..
يتعدم بدون تعديلات ..
اصل قتل النفس اسهل ..
من قتل شخص عايش ..
ع اللي باقى مـ اللي فات ..

ربك ده طيب

احترام الروح ده فرض ...
من فرائض الرسول ...
في لما انت تكون علاج ...
لكل حزن ف قلب حد ...
بكره برضو لما تحزن ...
حزنك انت اوام يزول ...
افرح لو مرة عادي ...
هات شيكولاته كادبري ...
واصحى لو مرة بدري ...
واسمع ف يوم اغاني ...
وبطل ف حياتك تعاني ...
خليك فرحان علشان ..
لسه ف قلبك اماني ..
افتح شباك ف قلبك ...
وارمي منه جروحك ...
لازم تفرح عشان ...
الفرح هيحلي روحك ...
يا صديقي انا كنت عاصي ...
وف قلبي كتير ذنوب ...
بس عادى الانسان طبيعي ..
يكون كله عيوب ...
لكن انا كنت اقوى ...

من اني افضل بذنبي ...
فد روحت بسرعة جاري ...
علشان ألحق اتوب ...
ودخلت الجامع عشان ...
اتوضى واصلي والحق ..
واكون من ربك قريب ...
ف عرفت بعد يوم ...
ان ربك ده طيب ...
علشان بسرعة سامح ...
وبعت لي حسنات كتير ...
بدل كل الذنوب ...

جواب في البريد

جواب في البريد ..
والمكان كان بعيد ..
والدقائق والساعات والشهور والسنين ..
والشتا والمطر والعيون المجروحين ..
قلب عايش بين سفر وبين حنين ...
كل دي اشيء تؤكد اني من بعدك حزين ..
في سفر بيبقى سور ..
مش ضروري يكون بحور ..
الظروف خلقت ظروف ..
من جسور فوق جسور ..
والكلاب واقفين عند ابواب القصور ..
والعساكر والسلاح ..
والقنابل اللي مزروعه في بستان الزهور ..
كل دي عواقب قصادي ..
بس برضو بعثتهولك ..
نص الجواب :
عامله ايه .. ؟ وانتى محبوسه .. ف سجن اوضتك ..
انا يمكن اكون تمام ..
بس اصعب حاجة ف الأيام ..
لما بفتكر لحظاتي لما سيبتك ..
فاكره يومها لما اهلك جم خدوكي ..
وانتي ماسكه كفي ..

شوفتي كام حد ..
شذك من كفوفي ..
كل ما اقربك مني خطوة ..
تبعذك الف خطوة ظروفك ..
وتكمل ظروفي ..
نفسى اقول لك انك انتي بنتي ..
وانتي ماما ..
وانتي بابا ..
وانتي اختي ..
شوفتي قد ايه يموت ..
لما حسيت بأنك بس خوفتي ..
بس برضو متزعليش ..
ايوة صليت كل الفروض ..
وفطرت قبل ما انزل عشانك ...
وسمعت صوتك ف المسجل ..
بس اصعب حاجة هي ..
اني لسه مشوفتكيش ..
ف ان وصل لك هذا الجواب ..
يمكن ساعتها اكون اتقتلت ..
بس برضو ما تخافيش ..
اصل انا عايش ف دمك ..
ف مهما مُت ..
فيكي هعيش ..

حبر سري

شباك من غير سما ..
والقلب عايش بنص مات ..
كل الحاجات اللي راحت من هنا ..
سابت ورق .. وكام رسالة مكتوبه بحبر سري ..
ولحد دلوقتي مافهمتھاش ..
يا شبه حاجة ميتة ف حد عاش ..
الذكريات ملعونه ..
زي ما تكون سرطان ف جسم ..
من كتر الوجع ملفوف بـ شاش ..
ورقة ومكتوب عليها سري جدا ..
ف فتحتها وياريتني مافتحتھاش ..
انا حد عايش كيف ...
اصل العما مش عما العيون ..
فيه ناس بتفضل عمرها ..
شايفه ناس كويسة ..
لكن ف آخر المطاف ..
بتخييب الظنون ..
شباك وعصفورة وكام علبة سجائر ..
دخان كتير مالي الصدور ..
والشكل احلى ف الظهور ..
لكن ف قلبه نوع ..
من انواع الخمور ..
بتشوف كتير شخص بيضحك ...

لكن ده اكبر دليل بانه مش مسرور ..
وبتشوف بنات كتير بترقص ..
عشان تريح قلبها المكسور ..
اوع ظهور الشكل في الاشخاص يخدعك ..
عمر الملابس والبرفانات ..
ما بتستر زي ظلام النور ...

أعبط خلق الله

عايزه انسى الماضي ...
ولا عايزه رقمه يكون موجود ...
بس انا حافظاه ..
ودي مصيبة ..
علشان لما اضعف ...
وروحي لروحه تشتاق وتعود ...
برجع اقوم متصله ...
ف يرد عليا بكل برود ...
ازيك وواحشني جدا ...
ف يقول لي عايزه بس ايه ؟
انا مش عايزه اشحت منك ...
انا بس عايزه ...
روحي ...
وقلبي ...
اللي ضحكت عليه ...
انا خايفه احب من تاني ..
ولا عايزه اتعود ولا افارق ...
انا نفسي اقول لك بس ليه ...
اخترت لقلبي تكون سارق ...
وسايبني من غير قلب ...
ف بحر مبركب غارق ...
دا انت حتى قطعت الخيط ...
اللي كان رابط علاقتنا ...

وساينني ف آخر انفاسي ...
مع ماضي يسمي حكايتنا ...
ابعت لك ايدي عشان تمسكها ...
لكن برضو بترجع فاضيه ...
ما انا كنت زمان بحياتي ...
من قبلك مبسوطه وراضيه ...
وانت الي فضلت تحاول ...
علشان اتعلق بس بيبك ...
وبسرعة بعد اما اتعلقت ...
سيبتني و روحي متعلقه فيك ...
دا انا لما بنام ...
بقول اسمك ...
لدرجة اني بخاف من اهلي ...
انا نفسي اقول لك بس سؤال ...
هو انت زي ما انا بشتاق ...
برضو يا حبيبي بتشتاق لي؟!
ولاً انت عادي بجد ..
وإن كنت عادي ..
ف عمومًا ..
يا اناني ...
يا أعبط خلق الله ...
انا بكره هقابل شخص أكيد ...
وهيبقى ليا روح وحياء ...

بواقى فاضله من ضحكة

عمق الحزن ف ملامحك ..
مقسوم ما بين اتنين جواك ..
تخاف تعشق عشان مجروح ..
ومين جارحك ومين قوأك ..
ملامحك فيها شيء غامض ..
بترمي الدنيا ع المکتوب ..
ونفسك لو ف يوم ترجع ..
لطفل بريء بدون اي ذنوب ..
خناقة ودوشة وصراع ..
ما بين روحك وبين جسدك ..
ومين اللي فيك باع ..
ومين اللي ف ضحككتك حسدك ..
عايز لو بس مرة تطير ..
وتخرج من واقع كداب ..
مفیش ف الدنيا اي خير ..
مفیش غير فرقة ..
مدموجه بأوجاع وعذاب ..
عشقت سنين وكام يوم ..
ونمت كتير اوي فرحان ..
لكن الهم كان مقسوم ..
على احلام من الاوهام ..
سيناريو و فليم وسجاره ..

وفيه القصة مكسوره ..
غاوي تحب ..
غاوي خسارة ..
وعينك برضو معذوره ..
لكن بتحاول على قد ما تقدر ..
تكون فرحانة ف الصورة ..
لكن انت بقيت شفاف ..
ودايمًا حزنك بقى متشاف ..
طريقك سكة مفيهاش رجوع ..
وصوتك على طول صامت ..
لدرجة انه مش مسموع ..
وعمق الحزن ف ملامحك ..
بواقى فاضله من ضحكة ..
بتخفي وراها دموع ..

داين تدان

حب كان من ناحيتك ..
بس اتسابت بوجع ..
حد تاني طالب محبتك ..
لكن مفيش ف قلبك مكان ..
انت ليه بتضحك كده ..
انت ليه خايف اوى ؟
دا اللي سابك راح لغيرك ..
واللي خانك ..
ف يوم هيتخان ..
اصل الكون ماشي بمبدأ ..
يا ابن آدم داين تدان ..
ف اوع تبات ظالم ..
خليك دائماً مظلوم ..
واوع تنام خايف ..
لو كنت من حاجة محروم ..
علشان ربك قادر ..
انه يفرح قلبك ..
لو حتى كان مهموم ..
خليك سطحي مع الناس ..
واوع تقرب بزيادة ..
وان مرة حبيت حد ..
حب ياريت بحدود ..

الحب ان زاد بين حد وحد ..
بتكون الفرقة شيء مقصود ..
ولتلك الاسباب اوع ..
تجرح حد ف قلبك موجود ..
خليك انت المجرح ..
علشان الجرح من ربك ..
ف يوم هيكون مردود ..

متدوريش

ماتسبينيش كلمة بتتقال ...
وقت اما نكون فعلا خايفين ...
لكن برضو داها عارفين ...
اننا لازم ف لحظة نتساب ..
ده مفيش في الكون كله ...
شخص واحد مش كداب ...
ماتسبينيش محتاجك جنبي ...
لازم اسيبك لظروف ...
طيب ما تقول لي ايه ظروفك ؟
قدرك يا حبيبي ومعروف ...
لا مش قدرني دا انت اناني ...
ازاي هتسبيني وهتروح ...
تحب ف اي بنت ثاني؟!
انا ماشي خلاص انسيني ...
ولا مرة حتى تلوميني ...
علشان من حالتك مكسوف ...
يمشي ..
ف تبكي وتنهار ...
وتعدي ليالي وسنين ...
وبترجع ثاني للماضي ...

نفس المكان ...

نفس الدقائق والساعات ...
نزل المطر ...
تحت تهديد السكات ...
مطر العيون سيكون وجع ...
وانتي اللي قلبك انخدع ...
بتعيطي ليه نفسي اعرف!؟
ما هو خلاص قال لك ظروف ...
ومن القسوة اللي ف كلامه ...
قلبك نزع رعشه وخوف ...
ممکن بقى ...
تبقي اقوى من الحديد ...
واعرفي ان هو عايش سعيد ...
وحب تاني من جديد ...
ف انتي ليه عايشه كده ...
بوجع قلبك الوحيد ...
ما تحبي تاني ...
ايه يعني يمكن تخسريه ...
الامان مبقاش منه فيه ...
الحنان يمكن يكون اسهل كثير ...
ف ارسمي على السرير ...
أمك عشان ماتت ...
واترمي ف حضن رسمتك ...
يمكن ساعتها هتلاقيه ...
لكن ياريت متدوريش ...
ف وسط الصور ...

والمواقف ..
والرسائل ...
وامسحي الكحل الي سائل ...
من عيونك ع الخدود ...
حب ايه !!
وازاي يسمى بس حب ..
وهو فاقد كل الوعود !?

oboiikan.com

يا ليل

غريب ف دار مهجورة ..
ينام الاهل طول الليل ..
وهو يعيش ف حضنه صورة ..
و يجبر روحه المكسورة ..
ع الضحكة ف وسط الاحزان ..
ينام الليل كثير زعلان ..
يحب الفرحة كثير جدا ..
لكن الفرحة دلوقتي ..
بتبقى صعبة ع الغلبان ..
حابس روحه ف اوضة بشيش ..
يموت ف صوره نبض غاوي يعيش ..
ومهما تمر الايام .. ومهما تمر برضو سنين ..
بيرجع ثاني ف قلبه حنين ..
لحضن امه اللي مش موجود ..
لمسكة ايد حبيبته ..
لوشه وهو فرحان ..
لحضن بجد من صاحب ..
لإحساس بلحظة شاردة فيها امان ..
يا ليل بلاش تيجي ع الغلبان ..
وكون صاحب ف قلبه حنان ..
واحكي واسمع للموجوع ..
ياليل كل البشر ف عينها دموع ..
ومحبوسة بقالها زمان ..

obseikan.com

احلم

احلم و بلاش تبقى ضعيف ..
و حب روح بنت و متحبش جسدها ..
خليك ف مرة انسان نضيف ..
الحلم حاجة بتتكسر ..
لإنها مصنوعة من ازاز ..
ومفيش حد ف يوم وليلة وصل ..
و بقى حاجة كويسة زي ما عاز ..
كل اللي ناجح مر بمحن ..
و كتير اوي انكسر ..
نام والدموع ف عنيه ..
والحزن داها كان ..
بيحاول يسيطر عليه ..
لكن في آخر الطريق ..
وصل للي كان نفسه فيه ..
اضحك يا بيه ..
الدنيا دي عايزه ايه ..
غير بس انها تكسرك ..
ف ان لقيتك قوي ..
وما بتخافش من حاجة ..
هتحنس انها بتقدرك ..
كوكب فيه الحزن زيادة ..
ف تعالى انا وانت نغير العادة ..

ونكسر كل فناجين القهوة السادة ..
ننزل الشارع ونوزع ..
على طفل صغير شيكولاته ..
ونركب عجلة بكل بساطة ..
ونشوف ايه اللي عايزينه ..
ونقوم بسهولة عاملينه ..
ونضحك اوي ونقوم نجري ..
من حزن احنا عايشينه ..
احلامك بالحزن هتموت ..
وسنين وسنين هتفوت ..
وانت واقف ف مكانك ..
اتحرك قوم اجري واسعى ..
وافرح هتحلي ايامك ..
ارمي تكشيرتك ف الشارع ..
خليك ف الضحكة انسان بارع ..
والحلم طموح واماني ..
والعمر يسرق ايامك ..
ف حاول على قد ما تقدر ..
توصل لحلمك هتلاقي ..
حلم مخلوق علشانك ..

عاجز عن النطق

تعبان بجد من حالي ...
ومش عارف انا مالي ...
دموعي بتنزل على خدي ...
ووجع الروح بقى غالي ...
مفيش بس انا محتاج ...
يكون ضهري مسنود ..
كسرتني الهم ف حياتي ..
كإني بهمي موعود ...
قفلت الاوضة بالتراس ...
دخلت الحبس بقيودي ...
كسرت الكرسي ...
والفازة ...
واكثر صورة بعشقها ...
ضربت الهم بالأقلام ...
ضربني الهم بفراقها ..

سهرت الليل عشان ابكي ...
وكان جنبي التليفون ...
لقيت الرنه كت هي ...
طاوعني شيطاني ادوس على (رد)
وفعلا قررت ادوس
وردت بس يا خسارة ...

لقيت صوتي كان محبوس ...
كإني لساني كان عاجز ...
لإما طبيعي ده برضو كابوس ...
انا مش قادر انطق اقول ...
بإنها حقيقي وحشاني ...
الو ...
بصوتها وبرقه ...
لساني عايز يتحرك ...
لكن والله مش قادر ...
عاجز نفسه يقول حاجة ...
يا وحشاني انا سامعك ...
لكن انتي مش سمعاني ...
يارب انا عايز ...
اتكلم لو بس ثواني ...
واقول لجزء من جسمي ...
يسمى بنصي الثاني ...
بإني من يوم فراقها ...
رجعت بقلبي وحداني ...

لحسن الحظ تليفوني (قام فاصل)
ف عجزي راح مني ...
واتاري العجز كان مخصوص ...
لحجز صوتي عشان (مبيقاش ليها واصل)
صرخت ساعتها (بطفولة) ...
ف اوضة كل حاجة فيها مكسورة ...

لا عارف اني اجيب شاحن ...
فـ خايف لـبكره استنى ...
فـ يرجع اللسان تاني ..
لـحـالـته برضو (مشلوله)...
انا كان نفسي بس اقول ...
بـانـي كنت فـ يوم غلطان ...
عشان فـ مره قلت فراق ...
اهو دلوقتي مش قادر ...
اقول لك بس يا حبيبي ...
فـ بعدك اني مشتاق ...

obseikan.com

قدري

احتمال افرح خلاص ...
واني اعيش مبسوط بجد ..
واني اجري
واني اجيب شيكولاته كادبري ...
واني احب الكون عشان ...
انتي يا حبيبتى قدرى
المشاعر لسه خايفه ...
لو تحس بحب تانى ...
واني اشوفك مراتى ...
ده كان حلم و امانى ...
هاتى فستانك طويل ...
هاتى فستان بالحجاب ...
وصدقيني مش اوامر ...
بس انا عايزك تكوونى ...
رافعه راسك يوم الحساب ...
احضيني لو ثوانى ...
وسيبى روحك جوه روحي ...
وافتحى قلبك عشانى
وبكل فرحك بس بوحي ...
ولما بس اعرف بانك
خلاص هتبقى بطيخة ...
وشايله جواكى ابنى ...
هحضنك بدرجة غريبة ...

حتى لو قولتي لي سييني ...
دا انا مخلوق عشانك ...
يالي جواكي روح ...
تبقي برضو حته مني ...
الحب حالة بسيطة ...
والبنت طفلة وعبيطة ...
يمكن تحبك عشان حنانك ...
يمكن من اي واحدة تغير ...
فانت لازم تبقي عارف ...
ان قلب البنت قلب ...
بيحب جدا وبضمير ...

كذبة

مافيش ممنوع ولا مرغوب ...
ولا حب من غير حتى عيوب ...
مفيش انسان عاش ع الارض ...
وكان خالي من اي ذنوب ..
ومين كان نفسه يموت حتى ...
من غير عن اخطاؤه ما يتوب ..
يا جنة انا ليا فيكي بيت ...
ولأ هعيش على طول سواح ...
انا ف حياتي عمري ما كنت ..
سعيد ولا كهان مرتاح ...
مريض بالضحك وقت الهم ...
كإني حقيقي ما عنديش دم ..
لكن انا كنت بضحك بس ...
وانا فيا هم ما بيتلم ...
صحيح الضحكة كانت كذب...
واكثر كذبة بعشقها ...
لدرجة اني وصلت ف يوم ...
لإني حقيقي اصدقها ...
ممثّل بارع جدا ف اي دور ...
ساعات شرير ...
ساعات طيب ...
وعمره ما كان من حد قريب ...
وكمل معاه للآخر ...

عشان كده دايمًا مكسور ...
مفيش ممنوع ولا مرغوب ...
مفيش حد ماخافش ف يوم ...
من اي شيء مكتوب ...

روح واحدة

هاتي قلبك جنب قلبي ...
هاتي روحك جنب روحي ...
واوعي ابدًا يا حبيبتي ...
لحد غيري انك تبوحي ...
عيطي ف حضني عشان ..
حضني ليكي انتي و بس ...
واحضني ف روحي عشان ...
روحي بيكي عايزه تحس ...
لو مجرد بس انك ...
تدخلي شرياني راضي ...
لو مجرد بس انك ...
تبقي دمي برضو عادي ...
هاتي نفسك جنب نفسي ...
وافتحني عقلي عشان ...
تعرفي انا قد ايه ...
مش عايز اي واحدة ...
يبقى ليها زيك مكان ...
انتي في القلب الوحيدة ...
انتي الطفلة العنيدة ...
بس عادي ..
ايوة عادي ...

كفاية اني اشوفك قصادي ...
كفاية اني احس اني ...
ليكي انتي وانتي ليا ...
تبقى عايشه بس فيا ..
وابقى عايش بس فيكي ...
ولما اموت اموت معاكي ...
ولما اعيش اعيش معاكي ...
واني اغبر لإني راجل ...
ورجولتي تبقى ايه ...
لو يا حبييتي مش عليكي !

الكون بيدور

فكرت و فكرت ...
ولا عمري ف مرة اختارت ...
عشان دايمها الحاجة عليا مفروضة ...
وازاى عيونك لما تشوف الحقيقة ..
تلاقيها من الحقيقة مخضوضه ...
معقولة ماتعرفش ...
انك ميت بيعيش ع الارض؟!
فكرت وفكرت ...
القلب المتعور على طول ...
مش عارف ليه مايقاش مقتول ...
والاصعب ان التعويره ...
بتموت من كتر وجعها ...
لكن عمرها برضو ما بتزول ...
وانت اللي دايمها متعور ...
وبتاخذ بنج عشان تضحك ...
لكن بتموت لما يروح المفعول ...
انا كنت طفل زمان بيمثل ...
على كل الخلق انه بيبيكي ...
علشان كان عايز مثلا حاجة ...
دلوقتي اهو بيمثل تاني ...
لكن تمثيلي اني فرحان ..
معقولة اكون موجوع جدا ...

ولا مرة بيان اني زعلان !

ازيك ...

عادي انا زيك ...

بضحك علشان انسى الاحزان ...

ازيك انت يا صديقي ...

انا زيك برضو ناقصني امان ...

والكون بيدور ...

واحنا بنكبر ...

بقلب اسود ..

وحزين بهتان ...

من بكره انا لازم اتغير ...

واتحول الى انسان عادي ...

مبيضحكش عشان صورته قصاد الناس ...

ملعونة الضحكة لو كانت زيف ..

ملعون الكوكب ابو شكل مخيف ...

انا عايز اعيش الباقي من عمري ...

ف صورة واحد بجد نضيف ...

الكون بيدور بحكمة الله ...

وانا عايش بس ناقصني حياة ...

ف يارب ابعت لي امان من فوق ...

وانا هفضل دافن جسمي جواه ...

جرح الماضي

بين نفسي كلام مبيتقالشي ...
غير لما اكون صحيح تعبان ...
انا نفسي الناس متسألشي ...
ف مرة عن الماضي زمان ...
ده الماضي بجد بيكون ...
ف علاجه اصعب من الادمان ...
انا نفسي انسى نفسي ...
ف حضن واحد هو بس ...
من ضمة حضنه لجسمي ...
جسمي بأمانه يقوم حس ...
مش لما اكون محتاج ...
ملاقيش حد يكون جنبي ...
انا طفل برغم اني كبير ...
وده طبع اكيد مش ذنبي ...
الدنيا اسود في اسود ...
والعالم داير بيدور ...
وانا اضعف انسان يمكن ...
ف العالم كله مكسور ...
دكتور انا يمكن اكون تعبان
لكن مش عارف اقول لك ايه ...
دكتور انا خايف اوي زعلان ...
ومش عارف من كتر الالوجاع ...

ايه اول جرح انا هحكي عليه ...
ف ان كان ولابد انا اقول ...
انا عايز امنية وحيدة ...
اني اصحى الصبح بدري ...
وانام بليل بنهاية سعيدة ...
هو كل اللي انا محتاجه ...
شوف بقى ازاي انا راضي ...
اني اعيش لو يوم واحد ...
من غير جرح الماضي!؟

احساس وجع قلبك

دموعك وهي نازلة ..
لازم تجاوبك ع السؤال ..
ايه اللي صابك ..
وليه كتفك اليمين مال ؟
شايل انا اوجاع ..
وماشي بوزع ضحك ..
تسألني .. ازيك ؟
الرد ماشي الحال ...
الجرح ف ضلوعك ..
بنزينة وعود كبريت ..
والحزن ف عيونك ..
صمت ساعات وصويت ..
ناي ومزيكا ..
والشارع الفاضي ..
والقمر والليل ..
وتفكيري ف الماضي ..
احساس وجع قلبك ..
لما زمان كنت يتيم ..
احساس وجع عينك ..
لما بتضحك قد ما بتضحك ..
لكن مفيش جواك ..
اي مكان حتى سليم ..

obseikan.com

من طرف واحد

غريبة الدنيا و الايام ...
لا عارف فرحي حتى بكام ...
بحس كل يوم اني ...
مجرد وهم مـ الاوهام ...
احب ازاي ف حد جديد ...
وانا قلبي ناقص له وريد ...
قطع انفاسي عن روحي ...
من كتر ما انتي بعيد ...
حياتي واقفة من بدري ...
ولو حتى وفيت ندرى ...
باني ف يوم ما حبش حد ...
هعيش ازاي بقية عمري ...
وانا عاجز ف اوضة وحيد ..
بحبك ليه ما حبتنيش ...
ولما جيت قفلتي الشيش ...
ضربتني قلبي بعدم الرد ...
يا ضحكة كنت بيها بعيش ..
خلاص دلوقتي مش عايز ...
اكون ف صورة حد معطوف ...
واصعب حاجة لما تحس ...
ف وقت امانك بلحظة خوف ...
عشان كده دلوقتي هموت ...

وهموت الحب مش مكسوف ...
ولما الناس تقول مات ليه ...
قولي وبكل قوة ظروف ...
انا مش عايز اكون ملهوف ...
على اني اعيش جنبك ...
ما هو الحب لو كان ...
من طرف واحد مش ذنبك ...
فـ مش ينفـع تكوـني وريـدي ...
ولا ينفـع اكون دمـك ..

انفجار

انكسار بدون علاج ..
يعني شاش يعني حبس ..
كل حاجة لاحتياج ..
اني ادخل برغبتى ..
جوه اوضة وتبقى حبس ..
الرصاص مش رصاص سلاح ..
فيه ناس بتموت من الجراح ..
وفيه ناس البكا ف حضنها ..
شيء بيبقى فيه ارتياح ..
حبسك انت ..
انفرادى ..
بحر قلبك بحر فاضى ..
وحدتك والتعود ..
انت بيهم حد راضى ..
انكسار الروح زهايمر ..
فيه بتنسى كل حاجة ...
مين حبيبتك ..
مين صحابك ..
مين جرانك ..
مين عدوك ..
انت ابيض مـ البياض ..
خالي من كل حاجة ..

انكسار الروح بيشفي م السواد ..
يعني بترجع للطفولة ..
يعني الضحكة ف ازدياد ...
بس ثانية ممكن انطق ..
اتقي شر الحليم ..
بعد وقت الانكسار ..
لإنه هيبقى اصعب ...
من الرصاص ..
في القتال ..
كل حاجة هتبقى جاهزة ..
للانتصار ..
ف اوع تيجي على حد ابدا ..
يكون بيضحك عشان يخبي الوجع ..
لحسن ف مرة يحصل انفجار ..

محدثش هيحس بحد

ساعات الوهم يموت ...
ف قلب حد كان خايف ..
ساعات يكون نظرك ٦ / ٦ ...
لكن للحقيقة مش شايف ..
ف اوع تقرب من انسان ...
وخليك دايما مش عارف ...
حقيقية الدنيا دي بتزعج ..
ولا فيها حد مرتاح ...
ولا حتى مش مجروح ...
ساعات الحب يموت ...
قلوب لسه فيها الروح ...
بلاش تبكي قصاد الناس ...
وابكي حتى ف الحمام ...
لإما تجبر روحك على الفرحة ...
لحد ما آخر حد من اهلك ...
يدخل على سريره ينام ...
عشان مالك ...
وليه بتبكي متقالشي ...
ساعات الصمت بيكون ...
احسن كثير من كلمة ...
خلاص بقى متزعلشي ..
انا نفسي ف يوم اصرخ ...

واقول كل اللي فيا بجد ...
لكن والله انا عارف .. بيان ..
محدث هيحس بجد ..

ساب لها ايه ؟

ف الحقيقة مفيش جديد ...
عادي سابها وقرر يعيد ...
حب غيرها ف يومين وبس ...
وهي لسه عايزاه سعيد ...
بس هو لو مرة حس ...
بالحب ده هيندم اكيد ...
ساب لها ايه غير شوية دموع ...
واللي كان رابط علاقتهم ...
من كتر الشد بقى مقطوع ...
هو يؤمر وهي تقول مسموع ...
هو يمشي وهي تحاول الرجوع ...
هو لو مره يخون عادي جدا ...
بس الخيانة لجنسها ممنوع ..
ساب لها ايه غير شوية صور ...
كل ليله بتبكي لما تحن ليه ...
وهو عايش لواحدة تانية ...
وهي عايشه لسه بيه ...
يا مغفل يالى ضيعت حب بجد ...
بكره الحب ده مش هتلاقيه ...
ساب لها ايه غير شوية رسائل ...
كل حرف كان زي الرصاص ...
والسؤال هو ليه ؟ لما نحب ...

على طول كده بنكون رخاص ...
ايوه طبعا ساعات كتير ..
بسبب الحب ناس بتموت ...
بس موت الحب يا خسارة ...
كان مفيهوش قصاص ...
ساب لها ايه غير شوية ذكريات ...
ف الاماكن والدروب و الحواري ...
وهي دايمًا بتحب السكات ...
ايوه ليه ؟
يمكن علشان كان مداري ...
كان مداري الدموع ...
كان مداري قلبها الموجوع ...
كان مداري لما تحن ...
لصوت مابقاش ف يوم مسموع ...
ساب لها ايه غير شوية مشاعر ...
لسه حية ف قلبها المكسور ...
والظروف الي قال عشانها ...
كان طبيعي يكون عليها مش مجبور ..
بس هو حب انه يسيبها خلاص ...
نفسى اعرف هو ليه ...
موت الحب مفهوش قصاص ..

سكينة

هات سكينه تكون باردة ...
وادبح بيها حيوان ...
لازم برضو هيتألم ...
شوف بقى انت الانسان ...
السكينه يمكن تبقى كلام ...
يمكن برضو تكون افعال ...
مش لازم سكينة سكينة ...
قتل النفس سهل جدا ...
لما تكون متعلق بحاجة ...
وف الآخر تطلع اوهام ...
ف لو انت قاتل محترف ...
بتحب تقتل ف قلوب الناس ...
حاول بس يكون القتل سريع ...
وبدون ما يكون فيه احساس ...
بطء الموت اصعب من ...
خروج من الروح الانفاس ...
اوع تحب ف يوم وتسيب ...
حد يتألم عشانك ...
لما تسيب انسان خد ...
صوتك اللي بيتردد ف ودانه ...
وصورتك اللي بيشوفها ف احلامه ...
وحط لو مرة نفسك بس مكانه ...
وشوف ازاي هو بيتعذب ...

وانت مبسوط بدأله ..
قلب البني ادمين مش لعبة ...
تلعب بيها وقت اما تعوز ...
حافظ على احساس الناس ...
واوع تكسر مرة بني آدم ...
علشان بالجنة بكره تفوز ..

من انواع السكاكين الباردة

(١)

انك تعود انسان على وجودك ...
ولما يتعود يقوم يتساب ...
هذا الشخص ييموت فعلا ...
بعد ما يكون الطرف الثاني ...
قرر من حياته يبقى غياب ..

(٢)

فيه انسان يفضل يرفع فيك ...
لحد ما توصل لفوق فوق جدا ...
وانت عشان واثق فيه
تفضل طالع طالع لحد الآخر ...
زي الطفل لما ابوه ...
يبرميه لفوق ف بيضحك ...

علشان عارف انه هيتمسك بيه ...
بس انت ياخساره ...
لما طلعت لفوق ...
اللي رفعك سابك تعدي ايديه ...
ف وقعت على رقبتك مكسور ...
وهونت ف لحظه برضو عليه ...
ف اوع ف مره تسيب روحك ...
لحد تاني وتوثق فيه ...

(٣)

كلام ممكن ف يوم يتقال ...
ويبقى زي رصاص خارج ...
لا ييموت ...
ولا يعور ...
لكن برضو مش بيتعالج ...
بيفضل يتردد كتير ف ودانك ...
ف تبكي
وبرضو تنهار
بصمت قلب موجوع ...
بيضحك علشان ما بيكيش ...
من اي كلام مسموع ...

obseikan.com

ممکن تفرح

ممکن تفرح لمجرد ان ...
امك موجوده و ابوك ...
ممکن تضحك لمجرد ان ..
اصحابك م الكون حبوك ..
ممکن تسمع فيروز ...
ممکن وقت اما تعوز ...
تعشق تعشق بضمير ...
والقلب المكسور ...
خليك انت ليه ...
بالضحكة فاعل خير ...
حب كل الناس عادي ...
واقطع شريان الماضي ...
مش هتموت صدقني ...
بس هتعيش مرتاح ...
خدت ايه ما فكرت ...
خدت ايه ما بكيت ...
غير انك حسيت بجراح ...
ارمي اي حاجه وراك ...
غير دمك من جواك ...
وافتح شريان للفرح ...
هتلاقي الفرح معاك ...
اكتب على روحك ممنوع ...
اي دموع ف اي دموع ..

وافضل فرحان للآخر ...
وادعي ربك بالمطلوب...
واكيد المطلوب مسموع ...
وهتفرح والله اكيد ...
ربك لما بيوعد حد ...
مش بيقلل وعده...
لا دي وعوده بتزيد ...

معلش

معلش ..
كلمة بتتقال ولا بتهدى ...
والعمر اهو ماشي ويبيدي ...
ويياخذ حاجه عشان نبكي ...
يمكن اموات ...
يمكن اصحاب ...
يمكن احباب ...
يمكن ... يمكن ...
لكن انا عارف ان ...
الجرح ف قلبي بيركن ...
لا بعيش مرتاح ...
ولا حتى ليا ف النسيان ...
دايما عايش كده زعلان ...
لا بقدر احب عشان خايف ...
ولا بقدر اصاحب حتى حد ...
ولا حتى بعيش مبسوط ..
معلش انا عارف اني ضعيف ...
ومن كتر الهم مضغوط ..
كان نفسي ...
اعيش زي البنى ادمين ...
لكن معلش انا مقدرش ...
ابقى من الناس الساكتين ...
واسكت وافضل ساكت ...

ولما احب اتكلم ...
وافضفض باللي واجعني ...
يطلع واحد صاحبي مثلا ...
يقول لي معلش ايه يعني ...
معقولة انا جرحي ...
يساوي كلمة معلش ؟
والله يا خسارة على دموعي ...
ويا خسارة على حتى اوجاعي ...
معقولة انا كنت عبيط للدرجة دي ...
والفيلم اللي كنت عامله ...
يطلع ف الآخر ملهوش داعي؟!
ويقول لي صاحبي معلش ...
اهي فترة يا حبيبي وهتهون ...
طب اضرب ...
طب اشتم ...
طب اموت ...
ولأ اسيبه ده واد مجنون ؟
انا كنت بفضفض ليك يا عبيط ...
علشان محتاج منك حل ...
لكن معلش دي كلمة بسيطة ...
وهتفضل برضو ف نظري اقل ...
من إنها تشفي حد ف يوم ...
اتفارق ...
واتخان ...
واتذل ...

بغير

تعبيرات وشك ..
وشكلك البسيط ..
حُب مين ..
الي يشبه لبحرك الغويط ..
معلوماتك عن الرجولة ..
واني دايمًا بغير ..
احب اقول لك اي راجل ..
بغيرته مش عبيط ..
اي راجل حب بنت ..
ف يوم لازم يغير ..
اي طير محبوبس ف قفص ..
بيبقى حلمه ..
لو ف يوم بس يطير ..
واني اغير عليكى دايمًا ..
ده حب يا عبيطة ..
واني اشوفك طفلة دايمًا ..
ده حب يا حبيبتى ..
واني احس انك صديقتى ..
واني احس انك مراىى ..
واني احس انك اميرتى ..
واني اشوفك بالبنات ..
يالى ف ابتسامتك فك ضقيتى ..
انا راجل بغيرتى ..

وانتى انوثه بحنانك ..
انا روحك .. انا ابنك ..
وانتي امي بأمانك ..
ياللي فيكي كل حاجة ..
ياللي مخلوقة من دراعي ..
وبين ضلوعي بتنامي ..
ياللي موجودة ف حياتي ..
انتي وردة .. ف بستان كياني ..
الرجولة مش بحبك ..
الرجولة اني اخاف ..
اني اسيبك لو ف مرة ..
او احس الاختلاف ..
ف المشاعر مع بنت ثاني ..

ياللي منك انخلق ..
الطهارة والعفاف ..
دا انتي حاجة ف احتمال الانقراض ..
ف كان لازم عليكي ..
اغير و اخاف ..

قصاقيص

١

انا كان نفسي اكون بارد ...
ولا مره انام بيكي عشان زعلان ..
وليه الجرح كان وارد ...
ف حياي من اعز انسان ...
صحيح الوجع واحد ...
لكن بيفرق من واحد لـ لواحد ...
معدل صدمة الانسان ...
ف شخص ف حياته كان ...
صديق وحبيب واخ ...
بتبقى صدمة ولا البركان ..
انا كان نفسي اكون بارد ...
ولا ابكي على أي حد ف يوم ..
واقول ايه على حد كان طيب ...
ف من طبيته مات مسموم ...
انا مش جاي دلوقتي ...
ولا اشكي ولا حتى الوم ...
انا بس حبيت اقول ...
بإني بجد سعيد جدا ...
عشان بس بنام مظلوم ...

روحك تملي تخاف ...
لو انها تتشاف ...
وهى بالماضي عريانة ...
والبنت اللي تنام ...
هريانة زعلانة ...
تبقى بتتمنى الموت ..
والموت رافض روحها ..
من بعد ما حسست ..
ف لحظه بخيانة ...
احنا اللي دايمًا كدة ..
بنحب حد مش باقي ..
والعمر فيه كام يوم ..
من عمري انا باقي ..
اجمع واطرح ع ..
ايامي قبل ما اتساب ...
واوجاعي ف فراقي ...
هطلع انا الخسرانة ...
من بعد ضربه قلم ..
فوقت انا بيها ...
من طبييتي وغبائي ..

غيري القلب اللى داب ...
جوه شريانك يا ستي ...
واعرفي انك مجرد طفلة ...
ف صوره بنتي وحيبتي ...
غيري حتى ف ملامحي ...
واضحكي ف لحظه هفرح ...
ولما اغلط ابقى سامحي ...
دا أنا طفل عمري ما بجرح ...
غيري طبعي وظروفي ...
ولما اغير متضحكيش ...
وافحتى شريان ف قلبك ...
جوه منه هموت واعيش ...

انا عارف انى بخاف م النور ...
 وحبب الضلمة ف وقت الخوف ...
 انا عارف انى كتير مجبور ..
 من بس حتى ف يوم الشوف ...
 روحي ف حالة نزيه ساكن ...
 ف كل جزء من جسمي ...
 لدرجه انى نسيت اسمي ..
 بـ حاله من وجع وظروف ...
 ضعيف ف اللمه وقت الجد ...
 عشان العين بتنزف دم ...
 عشان الميه ف عيوني ...
 بقيت مجروح بوجع الهم ...
 بحس بانى شىء مفضوح ..
 وانا بضحك ف باب مفتوح ...
 ف روحى على طول بيان ...
 عليه باينى كتير مجروح ...
 انا نفسى ف مره بس ...
 احس بحب او اتحس ...
 كتير على شخص عنده ضمير ...
 يقابل حد يكون بضمير ..
 ولا ف مره يكون متساب ...
 مشاعري خلاص بقت دلوقت ...
 متقدرش على أي غياب ..

الحضن مش ممنوع ...
احضنى حضن مباح ...
انا نفسى احس ايني ...
قلبي في يوم مرتاح ..
وان كنت يا واقع ...
بتحرم الاحضان ...
ده الحضن ده بيشفي ...
حتى من السرطان ...

احكي لي عن روحك شويه ...
 بس ياريت ما تعيطيش ...
 روحك شفافة قصادي ...
 برغم انك ما بتحكي لي ...
 سابك لوحده امتى يعني ...
 برضو السكوت هو السكوت ..
 طيب سكوتك ده وجعني ...
 ادعيلي اني اقرب اموت ...
 لا بلاش الموت عشاني ...
 هو انت مين فكرني تاني ...
 انا اللي حبك حب ساكت ...
 عشان ميقاش انسان اناني ..
 صمت طويل بين العيون ...
 والصعب ف الصمت الكلام ...
 احساسها لسه متعالجش ...
 من ماضي كان كله الم ..
 مش عارفه ترد تقوله ايه ...
 احساس لسه مغمن عليه ...
 من جرح كانت عايشه فيه ...
 والبنت لما بتكون ف جرح ..
 وتلاقى حزن يكون حنين ...
 ع طول بسرعه بتتحمى فيه ...
 ف أحزني بس ف سكات ...

يمكن بحضنك جرحى تداويه ...
يحضنها لكن الحضن خاف ...
من كثر شوق الحضن ليها ...
ينكسر ضلع منها فيه ...

٧

بطلت اهتم ...
ما سعادي اهم ..
انا عمري ما كنت بحب بجد ..
ولا عمري ربطت روحي بحد ..
فرحان داها ..
علشان لا بوجع ولا موجوع ..
ولا نمت ف يوم بيكي ..
ولا نيمت حد بدموع ..
مربوط داها مربوط ..
بسعادة غيري وانا تعبان ..
وبحاول بقدر الامكان ..
انى احس بالغير ..
وان مرة لقيت حد زعلان ..
بحاول افرحه ..
بجين جوايا باسم الخير ..

انا عايز حاجه تفضل للآخر ...
 وماتسنيش مهما يكون ...
 انا عاقل جدا في حياتي ..
 وكمان يمكن اكون مجنون ...
 انا قلبي حب ناس ياما ...
 وفضلت احوش ف اصحاب ..
 لكن دي صعوبه الدنيا ...
 ف ان احنا نقرب ف سنين ...
 وف ثانيه بنقى اغراب ...
 الكون مش باقي على حاجة ..
 ولا حاجه حتى تستاهل ...
 لكن انا بزعل جدا ع العشرة ..
 لمجرد اني بس جاهل ...
 ف نصيحة مني اوع ...
 تبكى على حد قال ماشي ...
 اعتبر الماشي همزاجه ...
 إنه هو الخسران ...
 وارمى الهم من على ضهرك ..
 وخليك ف حياتك فرحان ...

عيط زى ما تحب ...
واضحك وقت ما تعوز ...
والخاين يكون ف حياتك ...
مجرد ورقة تحت الشوز ...
واخلق كوكب ليك انت ...
من غير ما يكون مليون..
خيانة وكذب وتزييف ...
انا عايز كوكب يكون فعلا ...
كوكب شبه نضيف ...
اعمل قوانين لحياتك ...
ولابد تكون قوانينك ..
بتنص على الاتى بجد ...
ان مفيش حد ملهوش حد ...
وان احنا اصحاب ف الله ...
اخلق كوكب يبقى فيه ...
حياه بجد تسمى حياه ...

كل الاوقات حكايات ..
وساعات الليل بيكون مأساة ..
مجنون انت ..
لما تسيب روحك ..
لشخص ما ... ؟
يلعب بيها ويتسلى ..
ويسيبك عادي وقت اما يعوز ..
ف الاول علشان يكسب قلبك ..
كان ممكن يقلب اراجوز ..
وهي دي حقيقه الناس ..
ان الحاجه الموجوده بنهملها ..
ونروح لحاجات تاني غيرها ...
ف حياتنا تتعقد جدا ...
ونعرف قيمة الحاجه ..
لكن هيكون الوقت متأخر ..
لدرجه انك هتكون حد عجوز ..

صحيح الضحكة كانت كذبة ..
ولما الحضن ضم الجسم ..
صحيح الحضن كان كذبة ..
في احساسه وحتى الاسم ...
صحيح الوعد كان كذبة ..
في مضمونه وشكل الزيف ..
صحيح الصحاب كانت كذبة ..
بقلب اخرس وحتى كيف ..
صحيح الدنيا كانت كذبة ..
عشان جنه في شكل نضيف ..

دائما الانسان عامل ..
 زى الكورة الممسوكة ..
 بخيط متثبت فيه مسمار ..
 كل الخارج والداخل ..
 بيخبط فيه قاصد ..
 وهو ملكانه مش مختار ..
 خبطة ف خبطة كمان ..
 بيكون عبارة عن ورقة ..
 ومسكت فيها النار ..
 الانسان فتافيت من طين ..
 دوامة الدنيا كبيرة ..
 واحنا فيها مساجين ..
 عالم وهمي ..
 بنعمل فيه اننا عايشين ..
 نحب ..
 نسيب ..
 نخاف نعشق ..
 لا يوم تانى حبيبنا عن يغيب ..
 ومين عارف مصيره ..
 ومين اختار يكون له حبيب ..
 ده حب الصدفة مكتوب ..
 في علم الغيب ..

غريبه الدنيا بدون احضان ...
وليه الحضن بيبقى حرام ...
ده حضن الروح بيبقى كلام ...
ورعشه وصوت وخوف وامان ...
صحيح الحضن كله زيف ...
ومين مرة حضن انسان ...
وكان الحضن بجد نضيف ..
خلاص الحضن مات زمانه ...
وجيلنا هو اللى دفع تمته ..
لا صاحب ولا حبيب ولا اخ ..
ف لحظه ع روحنا يآتمنوا ...

اسف يا نفسي على الدموع ...
 معقوله بقيت للدرجة ضعيف؟!
 والوضع ف حالتى شبه مخيف ...
 لا بنام الليل زى البني ادمين ...
 ولا حتى عارف بس اعيش ...
 تسألني ازيك اقول مبسوط ...
 وانا حتى الفرحة ميعرفنيش ...
 حبيت حبيت اكثر من مرة ...
 وفي كل مرة بكون موحود ...
 مش عارف ليه انا حظي كدة ...
 داها عايش دور المخدوع ...
 آسف على كل مرة بكيت ...
 وان كنت بجد يا قلبي نسيت ...
 ازاى دلوقتي مشتاق له ...
 صدقنى هتفضل حد ضعيف ...
 طول ما انت بتبقى محتاج له ...
 ف اتعود من دلوقتي ياريت ..
 ان حتى ف مرة ف يوم حبيت ...
 متحبش اوي للدرجادي ...
 علشان في الاخر هيكون ...
 حب و راح لهامش الماضي ...

بهزر وقت اي جد ..
عشان خايف يشوفني حد ..
وانا مكسور ..
وبضحك رغم قيود اليد ..
ف سجن بأوضة مقفولة ..
مبيدخلهاش شعاع النور ..
خلاص قطرك سافر ..
وتذكرتك ملهاش لزمة ..
ووقت الجد والأزمة ..
بيان مين صاحبك ..
ومين وياك ..
لقيت الشارع المليون ..
ف وقت الشدة ..
كان خالي ..
محدثش باقي برضو معاك ..
هتفضل تجمع ناس ..
وف آخر الطريق
الكل لازم هينساك ..

بكي تي قصادي من خوفك ..
لاسيك يوم وانا زعلان ..
اسيب مين بس ماتبكيش ..
واحب ف مين وانا غيرك ..
حييتي ماليش !?
واموت ازاي وانا ف حضنك ..
بحس بلاني فيكي بعيش ..
يا سانداني وعارفاني ..
انا العصبي و انا الغيور ..
ف لو مرة انا كسرتك ..
هكون قبلك انا المكسور ..

شعورك سخيـف ..
 وقلبك نحيف ..
 وليلك مخيف ..
 وعمرك قصير ..
 وليه بس ليه ..
 بتكبر في شكلك ..
 وجواك صغير ..
 في اوضة في روحك ..
 شايـلة بلاوي ..
 وليه بس دايمـا ..
 بتحاول تداري ..
 بإنك في ازمة ..
 وإنك ضعيف ..
 شعورك سخيـف ..
 ساعات تبكي لكن ..
 بتبكي في صمت ..
 وليه بس لما ..
 بتلاقي دموعك هتنزل ..
 بتحاول تجبر عيونك ..
 ع الخضوع للابتسامة ..
 ف بتلاقي نفسك ..
 بسرعه ابتسمت ..

دبدوب البنت ..
كائن زى حبييها ..
تحضنه جامد جدا ..
وقت اما الكل يسييها ..
بتنام الليل وهو معاها ..
بتشوفه اخوها وابوها ..
بتحكي له عن كل حاجة ..
كإنه بشر عايش وياها ..
دبدوب البنت ..
انسان ف صوره كائن ..
من قطن يمكن لكن ..
اطيب من ناس كتير ..
دبدوب البنت ف حياتها ..
شيء غير قابل للتغيير ..

اوهم نفسك دائما ...
انك ف الجولة كسبان ...
وان حتى خسرت ماتيكيش ...
يا كل صابر على البلاء ...
بكرة في جنة ربنا هتعيش ...
وان مرة ربك ساب ايدك ...
متقولش ليه يارب بس ...
وسيب الكون لحكمة ربنا المجهولة ...
مش يمكن يكون هو شايف ...
ان انت ماشى في الحاجه عكس ...
وده برضو حاجه معقولة ...
ف اضحك في وقت البلاء ...
وارضى بكل شىء مقسوم لك ...
يفتح لك ربنا كل الابواب المقفولة ..

عندى حالة من الصراع ...
بين اللى موجود واللى ضاع ...
الطفولة راحت خلاص ...
تحت بند انت بقيت كبير ...
تحت بند ممنوع تكون ...
لو ف مرة عندك ضمير ..
كل حاجه بتموت عشان ...
قلبنا الابيض خلاص ..
بقي فيه السواد كتير ...

قلب خايف على قلب تانى ...
حد حس بحب حد ...
والظريف ف الحكاية ...
إنه كان حب بجد ...
بعد ما الحب كان كله زيف ...
هى حبت ...
وهو حب ...
حب روح البنات يمكن ...
من رجولة أي شاب ...
وحد رجولة أي راجل ...
من انوثة البنات ...
هى طفله ف شكل ام ...
وهو راجل ف شكل طفل ..
كان زمان الحب حى ...
بس دلوقتى مات ...

بلاش نبكى على الفاضي ..
 محدش للطبطة فاضي ..
 ومين هيقبل وييقى راضي ..
 يكون في الزعل قلب حنين ..
 علينا ف ليل من الماضي ..
 متتعودش تستنى ..
 مكامله عشان مش هتلاقي ..
 ومين لسه كمان باقي ..
 مفيش حد خلاص موجود ..
 ونبض القلب بقى مفقود ...
 بلاش نبكى على أي وعود ..
 وخلينا كدا عايشين ..
 بنضحك مهما نكون خايفين ..
 ونفرح بلحظه فيها حنين ..
 ويوم ما نفتكر حاجه من الماضي ..
 نقوم ف الحاجه دي قاتلين ..
 نصلي عشان نرتاح ..
 ولو الفرح ليه مفتاح ..
 هننزل نشتريه بفلوس ..
 ف صلي بدون اموال ..
 وقرب من ربنا جدا ..
 حياتك تتقلب خالص ..
 الى فرح بدون أي كابوس ..

بتغير جدا من أي حاجة ...
 مش عارف ليه دا إما بتغير ...
 معاني بحبها حدا جدا ...
 أكثر ما هي عارفه بكتير ...
 دا أنا لو بس حلمت انى ...
 بسرح شعر غير شعرك ...
 دا أنا ممكن والله اموت ...
 انا اصلا مخلوق ليكي ...
 وهفضل ليكي لحد ما ...
 اكون محطوط ف تابوت ...
 انا عايزك تبقي فرحانة ...
 ولا مره تنامي زعلانة ...
 وان كان على كل بنات الكون ...
 ف بنات الكون حاجه واحدة ...
 وانتى الحاجه ده يا حبيبتى ...

ف فرق انى احب روح ...
وانى احب جسم و بس ...
بكره الملامح برضو تروح ...
ويفضل ما بيننا حنين يتحس ...
مش لازم لما تحب تكون ...
بتحب حد جميل ف الشكل ...
مممكن لو يعنى يكون معقول ...
ما طبيعى الملح الزايد ...
بيبوظ طعم الاكل ...

obseikan.com

ممنوع الفرخ للأيتام	٩	معلش	٦٩
عندي رغبه شديدة جدا	١١	بغير	٧١
ارزقني يا رب راحة البال	١٣	قصاقيص	٧٣
الروح لا تزال في جسدي	١٧		
ربك ده طيب	١٩		
جواب في البريد	٢١		
حبر سري	٢٣		
أعبط خلق الله	٢٥		
بواقى فاضله من ضحكة	٢٧		
داين تدان	٢٩		
متدوريش	٣١		
يا ليل	٣٥		
احلم	٣٧		
عاجز عن النطق	٣٩		
قدرى	٤٣		
كدبة	٤٥		
روح واحدة	٤٧		
الكون بيدور	٤٩		
جرح الماضي	٥١		
احساس وجع قلبك	٥٣		
من طرف واحد	٥٥		
انفجار	٥٧		
محدث حيحس بحد	٥٩		
ساب لها إيه ؟	٦١		
سكينة	٦٣		
مممكن تفرح	٦٧		